



9 Abril 2020

Mensajen husi Embaixadór Australia nian iha Timor-Leste, **Peter Roberts**



Surtu COVID-19 hanesan dezafiu ida ne'ebé molok ne'e nunka akontese. Ami iha ne'e atu kontinua servisu ho Timor-Leste. Hau hakarak komunika ho imi semanalmente liu-husi buletin ida ne'e, atualiza ba imi informasaun kona-ba ami nia servisu iha Timor-Leste, no mós dezenvolvimentu iha area seluk. Konserteza, ami kontinua hakerek regularmente iha ami nia pájina Facebook, signifika katak bulletin ida ne'e hanesan sumáriu de'it.

Australia tulun dadaun Timor-Leste nia preparasaun hasoru no prevene surtu COVID-19 hada'et, nune'e mós jere nia impaktu iha area saúde no ekonomia. Ida ne'e signifika katak ami tenke ajusta hikas diresaun programa dezenvolvimentu hirak ne'ebé ezisti hodi apoiu Timor-Leste nia responde ba surtu COVID-19. Ami nia asisténsia hirak ne'e sempre iha koordenasaun ho Governu Timor-Leste no Organizasaun Mundiál ba Saúde.

Iha semana kotuk nia laran, Austrália:

- 01 Tulun Timor-Leste harí nia facilidade izolamentu ba pasiente COVID-19 iha Sentru Saúde Vera Cruz, nune'e mós apoiu Timor-Leste dezenvolve Prosedimentu Operasaun Permanente ba karantina nian, liután suporta izolamentu pasiente ho sintoma natoon
- 02 Hamutuk ho Menzies School of Health Research tulun kapasita Laboratóriu Nasional ba Saúde nia kbiit atu halo teste ba COVID-19 lokalmente, ami mós tulun konstrui dadaun ekstensaun adisionál ba Laboratóriu Nasional, nune'e mós hasa'eabilidade Hospitál Nasional atu jere prevensaun no kontrolu ba infesaun, halo tuir mata-dalan servisu Organizasaun Mundiál ba Saúde
- 03 Tulun ONG sira inklui Maluk Timor hodi fornese formasaun atu hasa'eabilidade ba pesoál saúde iha klinika sira iha Timor-Leste hodi prevene no kontrolu infesaun hanesan surtu COVID-19
- 04 Tulun Timor-Leste iha estabelelementu Sentru Integrado ba Jestaun Krize no fornese asesór husi Austrália nia Programa Defeza hodi apoiu ba Sentru ne'e nia operasaun
- 05 Tulun PNTL liu husi Polisia Federál Australia nia Programa Dezenvolvimentu Polisia inklui estabelese estasaun polisia provisóriu iha fatin hirak krítiku, no halo estasaun ba fase-liman iha polisia nia estasaun sira iha munisiú hotu iha Timor-Leste
- 06 Tulun médiku Timoroan na'in 9 fila-hikas husi Fiji mai rai laran atu reforsa Timor-Leste nia responde ba situasaun atuál



07

Fornese ekipamento protesaun pesoál no material médiku sira atu bele proteje Timor nia pesoál saúde sira

08

Implementa ona teste ba kualkér pasajeiru sira ne'ebé mak hala'o viájen husi Austrália mai Timor-Leste, nune'e Timor-Leste seguru nafatin husi surtu COVID-19

09

Fo garantia ba empregadu Timoroan sira ne'ebé partisipa iha Programa Traballadór Sazonal iha Austrália – nune'e sira bele hela no kontinua serbiu ba tempu naruk no mós iha asesu ba Austrália nia sistema saúde ho nível mundiál

10

Tulun mós hato'o mensajen saúde nian ba públíku (bele haree ha'u nia vídui fase-liman iha ami nia pájina Facebook!). Alumni husi Bolsu Estudu Austrália Awards fahe tutan ona mensajen ne'e ba públíku.

Obrigadu ba Royal Darwin Hospitál ne'ebé mak halo ona teste COVID-19 nian ho gratuita ba Timor-Leste, bainhira Laboratóriu Nasional hadiak hela nia kapasidade.



Ami agradese tebes ba parseiru hotu no sei kontinua servisu hamutuk nafatin ba oin.

Akompanhia nafatin ami nia pájina Facebook 'Australia in Timor-Leste' hodi hetan no atualiza informasaun kona-ba dezenvolvimentu hirak ne'e.

Maske iha tempu difisil nia laran, permite ha'u hato'o Ksolok Paskúa ba ita hotu!